



Inatsisartunut ilaasortaq Anthon Frederiksen, Partii Naleraq

E-mailikkut nassiunneqarpoq uunga: inatsisartut@inatsisartut.gl

**Nunaqarfinni qerititsivinnik imaluunniit qerinasuartitsivinnik
piviusunnngortitsinissamut pilersitsinissamullu suliniuteqarnissaq pillugu 37
naapertorlugu apequteqaammur nr. 032-2018-mut akissut.**

Nunaqarfinni qerititsivinnik imaluunniit qerinasuartitsivinnik
piviusunnngortitsinissamut pilersitsinissamullu Naalakkersuisut qanoq
suliniuteqarnerisut, Inatsisartut Suleriaasianni § 37 naapertorlugu
Naalakkersuisunut apequteqarputit. Apeqqutitit uannut akisassanngorlugit
innersuunneqarput, taakkualu matuma kingulianiipput.

Apeqqut 1:

**Nunaqarfinni tunitsiveqarnikkut ajornartorsiuteqarfiusuni, immikkut
taallugu Ikerasaarsuk, qerinasuartitsivinnik qerititsivinnilluunniit
pilersitsinissaaneq Naalakkersuisunit piviusunnngortinniarneqarsinnaavaa ?**

Akissut:

Nunaqarfinni isorliunerusunilu tunitsiveqarnerup tapersersornissaa
Naalakkersuisut politikkiminni eqeersimaarfigaat. 2018-imut aalisarnerup
piniarnerullu iluani suliffissaqartitsinissaq suliaqartitsinissarlu siuarsarniarlugu
qulakkeerniarlugulu, tunitsivinnut tapiissuteqarnissamut, aningaasanut inatsimmi
kontumi 64.01.05-imi 5 mio. kr.-t immikkoortinneqarput.

Aningaasanut inatsimmi kontumi tassani nunaqarfinni isorliunerusunilu
inuussutissarsiorerup suliffeqarnerullu ineriartortinneqarnissaannik
suliaqarnerup isumagineqarneranut tapiissuteqarnissamut 7,588 mio. kr.-t
immikkoortinneqarput. Aningaasat taakkua ilai assersuutigalugu nunaqarfimmi
qerititsivinnik pilersitsinermut aamma atorneqarsinnaapput kommunip tamanna
kissaatigippagu.

Tamatuma saniatigut nunaqarfinni, Ikerasaarsuk ilanngullugu, qerititsivinnik
pilersitsinissamut allilerinissamullu misileraanermut aningaasassat qanoq
naleqqunnerpaamik atorneqarsinnaanersut atugassiissutigineqarsinnaanersullu
nassuiaammik saqqummiussinissaq Naalakkersuisut sulissutigaat. Nassuiaat
2018-imi ukiaanerani ataatsimiinnermi Inatsisartunut agguanneqassaaq.

12-02-2018
Suliap nr. 2018 - 2989

Postboks 1601
3900 Nuuk
Tlf. (+299) 34 50 00
E-mail: isiin@nanoq.gl
www.naalakkersuisut.gl

Apeqqu 2:

Nunaqarfinni aalisakkanut toqqorsiviit tunitsiviit qassit maannamut nutarterneqarlutillu pilersinneqarsimappat ?

Akissut:

Nunaqarfinni isorliunerusunilu aalisarnermik inuussutissarsiuteqarnermut tunngatillugu misissuineq Naalakkersuisut suliaraat. "Nunaqarfinni isorliunerusunilu aalisarnermik inuussutissarsiornermi annertusisamik suliffeqartitsinissamut periarfissat pillugit nalunaarusiami" ilanngussami "Nunaqarfinni tunitsiviit" nunaqarfinni 55-iusuni tunitsiviit 45-sut paasissutissiissutigineqarpoq . Tunitsivinnit 45-nit taakkunannga tunitsiviit 20-t ammasut paasissutissiissutigineqarpoq, 12-it matoqqallutik aammalu 13-it paasissutissartaqaratik. Taamaattoq ilanngussaq taanna ulloq 23/11-16 nutarterneqarsimammat eqqumaffigeqquneqassaaq.

Tamatuma saniatigut Aalisarnermut Piniarnermullu Naalakkersuisoqarfimmit ilanngussassanik pissarsiortoqarpoq, tassani taakkua tunitsivinnut tunngatillugu paasissutissanik nutaanerpaanik tunniussillutik. tunitsiviit 23-t ammasut paasissutissiippat, tunitsiviit 24-t matoqqasut imaluunniit taamaallaat aalisakkanik panertitsisartut imaluunniit iluarsaanneqartut, aammalu 6-it paasissutissartaqaratik.

Apeqqu 3:

Apeqqutigineqartunut (1-2) tunngatillugu allamik attuumassutilimmi Naalakkersuisut ilassutissaqarpat

Akissut:

Naalakkersuisut allanik ilassutissaqanngillat.

Inussiarnersumik inuulluaqqusillunga


Hans Enoksen